

**Kalaallit Nunaanni imartap killeqarfiata 3 smil-iniit 12 smil-imut annertusineqarsinnaaneraniq periarfissat misissorneqarnissaanik kiisalu tamatuma inatsisitigut, aningaasaqarnikkut inuussutissarsiornikkullu kingunerisassai pillugit nassuiaateqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut. Misissuineq Inatsisartut UPA2028-mut saqqummiunneqassapput.**

*(Inatsisartunut ilaasortaq Jens NaptK', Naleraq)*

### **Akissuteqaat**

(Nunanut allanut, Inuussutissarsiornermut, Aatsitassanullu Naalakkersuisoq)

### **Siullermeerneqarnera**

Naalakkersuisut siunnersuuteqartoq Jens NaptK', Naleraq, Kalaallit Nunaanni imartap killeqarfiata 3 smil-iniit 12 smil-imut annertusineqarsinnaaneraniq periarfissat misissorneqarnissaanik kiisalu tamatuma inatsisitigut, aningaasaqarnikkut inuussutissarsiornikkullu kingunerisassai pillugit nassuiaateqarnissaanik Naalakkersuisut peqquneqarnissaanik aalajangiiffigisassatut siunnersuummik uannga saqqummiussineranut qutsavigaat.

 37 naapertorlugu apeqqut nr. 109/2025-mut Kalaallit Nunaanni imartap killeqarfiata annertusineqarnerani kinguneqaataasinnaasut pillugit akissut Naalakkersuisut inussiarnersumik innersuussutigissavaat. Tassanilu Kalaallit Nunaanni imartap killeqarfiata 3 smilinit 12 smilinut annertusineqarnissaata kinguneqaatigisinnaasai pillugit namminersorlutik oqartussani Danmarkimilu ministereqarfiit attuumassuteqartut akimorlugit itisiliilluni qulaajaanissap pisariaqarnera allassimavoq. Ilanngullugu tamakkiisumik misissueqqissaarnissap sulisunik aningaasaatinillu nunanut allanut naalakkersuisoqarfiup aammali naalakkersuisoqarfiit oqartussallu allat piginngisaannik pisariaqartitsiviussasoq allassimavoq. Taamaalillunilu aamma akisussaallutik naalakkersuisoqarfinni oqartussanilu, assersuutigalugu Kalaallit Nunaata avannaanni kangianilu nunami eqqissisimatitami oqartussaannermik isumaginninnermik, imaani avatangiisinik kiisalu ilisimasassarsiornernik ilisimasassarsiorlunilu imaani angalanernik isumaginnittuni isumalluuteqarnerunissamik pisariaqartitsiffiussaq, tassani taakkunanga ujarlernerit annaassiniarnerillu ilanngullugit.

Tassunga atatillugu Kalaallit Nunaata eqqaani immap naqqani nunap toqqavianik piumasaqaatinik Nunaat Naalagaaffiit Peqatigiinni illersuinnermik sulinerup aallartereersimanerata, erseqqissarnissaa pingaaruteqarpoq. Tamanna imaani oqartussaannermut immikkoortumut atatillugu suli ilungersuanerulersitsivoq, Kalaallimmi Nunaat Naalagaaffiit Peqatigiinni nunat toqqaviinut killeqarfinnut kommissionianut kungeqarfik sinnerlugu isumaqatiginninniarnerni siulersuimmat. Suliaq tamanna immikkut pingaaruteqarpoq Kalaallit Nunaatalu oqartussaaffiatut killeqarfiinut siunissami siunnerfiliisinnaalluni.

Pissutsit tamakku eqqarsaatigalugit, maannakkullu nunanut allanut politikikkut inissisimaneq eqqarsaatigalugu, nunanut allanut naalakkersuisoqarfik maannakkuugallartoq Kalaallit Nunaata imartami killeqarfiata 3 smilinit 12 smilinut annertusineqarnissaanut periarfissanik misissuinissamut, kiisalu inatsisitigut, aningaasaqarnikkut inuussutissarsiornikkullu kingunerisassai pillugit nassuiaateqarnissamut nukissanik pigisaqanngilaq.

Nunanut allanut, sillimaniarnermut illersornissakkullu periusissiatsinni 2024-mit 2033-mut atuuttumi, Inatsisartuni partiinit tallimanit sisamanik tunuliaqutserneqartumi, imartap oqartussaaffigisatta 3 smilinit 12 smilinut annertusinissaa oqallisigalugulu qissimigaassagipput allassimareerpoq.

Tamanna tunuliaqutaralugu aalajangiiffigisassatut siunnersuummut allannguutissatut siunnersuut tullituttoq Naalakkersuisut inassutigaat:

**”Kalaallit Nunaanni imartap killeqarfiata 3 smil-iniit 12 smil-imut annertusineqarnissaanut periarfissanik, tamatumalu inatsisitigut, aningaasaqarnikkut inuussutissarsiornikkullu kingunerisassaanik misissuinissamut Naalakkersuisut peqquneqarput.”**

Taamaalilluni nassuiaat nunanut allanut, sillimaniarnermut illersornissamullu politikikkut periusissiap ”Kalaallit Nunaat nunarsuarmi – pineqartilluta ilaassagut” piffissami atuuffiata iluani pilersinneqassaaq.